

gewyßer vnd vollkommener würde. Aber zum ersten das diß  
Instrument nur auff drey Elevationes oder dreyerley polus  
höhen gemacht ist/ nemlich auff 45. 48. vnd 51. darumb wo  
du an einem ort pist/ da der nitrechtlich meerstern / den wir  
Polus nennē 51. grad vber den horizontem erhebt ist / so lere  
das ort der rottel herfür / an welchem zwischen dem horizon  
vnd des Krebs creyß vnder des Instruments mittel punct /  
vnd vnder dem Tittel Polus höhe 51. grad geschriben steet /  
vnd also mach das Rete widerumb darauff / vnd bestetigs  
mit dem nagel / vnd prauch darnach das Instrument wie  
du wilt am selbenn ort / du tarffest aber daselbs die rottel nit  
weyter verandern.

Desgleich thu im auch / wann du an einem ort bist da gemel  
ter Polus vber den horizon 45. grad erhöcht wer / das Astro  
labium brauchen wolt / so thu er die obgemelte rottel gar hin  
weg / vnd brauch also das Rete auff dem grund der mutter  
gleich wie auff der rottel / dann die creyß so in dem grund der  
mutter gerissen sind / hab ich auff die polus höhe 45. grad ge  
rissenn.

47  
Hier ist zu mercken / wiewol das Astrolabium nur auf drey  
elevationes oder polus hohe gemacht ist / dz mans dennoch  
nit vnnützlich auff neünerley elevationes prauchē mag / nem  
lich das ort der rottel so auff 51. grad gerissenn ist / mag wol  
auff 50. 51. vnd 52. grad gebrauchen / Also auch das ort der  
rottel / so auff 48. grad gerissenn ist / mag man wol nützlich  
auff 47. 48. vnd 49. grad geprauchen / das aber so auff dem  
poden gerissen / nemlich auff 45. grad magstu wol auff 44.  
46. grad nützen / vnd also hastu daß diß Instrument an den  
orttern nützig ist von 43. graden polus höhe bis auff 53. grad  
als nemlich vast in gangem teutschen land / Aber wiewol ein  
yglicher wol selbs mercken mag / das diß Instrument gleich  
an den orttern darauß es gerissen ist / als wo die Polus höhe  
45. 48. vnd 51. grad hoch ist am gewisesten sein muß / noch  
mag mans one sonderm mercklichen nachteil auff die andern  
angezeygten vj. elevationes wol prauchen.